



Uunga  
Inatsisartunut ilaasortaq  
Randi Vestergaard Evaldsen  
Demokraatit

09-11-2017

**Kingornussisarneq pillugu inatsit il. il. § 37 naapertorlugu Inatsisartuni ilaasortap  
Randi Vestergaard Evaldsenip Demokraatineersup apeqqutaanut nr. § 37-219-imut  
akissutit**

Kingornussisarnermut inatsimmut tunngatillugu apeqqutitut nassiussanut qujanaq.

Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut  
Naalakkersuisoqarfik § 37-219-imut akissuteqarniarluni Justitsministeeriaqarfiup  
ilassutissaanik pissarsiniarsimavoq.

**1. Naalakkersuisunut nassuiaqquneqarpoq kingornussisarneq pillugu Kalaallit  
Nunaanni inatsisit nalunaarutillu suut atuunnersut:**

Justitsministeeriaqarfik imatut akissuteqarpoq:

*"Apeqqummut nr. 1-imut tunngatillugu Justitsministeeriaqarfiup  
ilisimatitsissutigisinnaavaa Kalaallit Nunaanni inatsisinut ujarliutit 2017 (kingullermik  
nutarterneqartoq ulloq 31. marts 2017) malillugit kingornussisarnermut tunngatillugu  
inatsisit nalunaarutillu ataani pineqartut Kalaallit Nunaanni atuutsinneqartut:*

- *Kingornussisarnermik Kalaallit Nunaannut inatsit Inatsit nr. 154, 27. maj 1964-imeersoq kingusinnerusukkut allanngortinneqartoq (inatsit nr. 578, 19. december 1969-imeersoq, inatsit nr. 579, 19. december 1969-imeersoq, inatsit nr. 259, 22. maj 1974-imeersoq, inatsit nr. 292, 24. april 1996-imeersoq aamma inatsit nr. 483, 21. maj 2014-imeersoq).*
- *Kingornussisarnermik inatsimmi § 39, imm. 1-imi aningaasanut angissusissaatit allanngortitaanerannik Kalaallit Nunaannut nalunaarut nr. 27, 11. januar 1974-imeersoq.*
- *Kingornussassiunerit qanoq suliarineqarnerisa inatsisini akerleriilersortarnerat pillugu Haagimi 5. oktober 1961-imi isumaqatigiissutip artortuulerneranik nalunaarut nr. 459, 19. september 1976-imeersoq.*
- *Kingornussassat toqusullu pigisaasa agguarneqartarnissaannik avannaamioqatigiit Danmarkip, Finlandip, Islandip, Norgep Sverigellu isumaqatigiissutaasa nutartikkap atuutsinneqarnissaa pillugu nalunaarut nr. 976, 26. august 2015-imeersoq."*

**2. Danmarkimi kingornussisarneq pillugu inatsit nutaaq 2008-mi atuutilerpoq.  
Inatsimmi tassani § 105-mi aalajangersarneqarpoq, Kunngip akuersineratigut  
inatsit taanna Kalaallit Nunaannut atortussanngortinneqarsinnaasoq.**

**Tamatumunnga tunngasumik Naalackersuisut eqqarsaateqarnikuunerlutik taava taamaassimappat qaqugu piviusunngortitsiniarpat? Akissut sukumiisumik tunngavilersoqquneqarpoq.**

Justitsministeeriaqarfik imatut akissuteqarpoq

*"Apeqqummut nr. 2-mut tunngatillugu Justitsministeeriaqarfiup ilisimatitsissutigisinnaavaa danskit kingornussisarneq pillugu inatsisaata Kalaallit Nunaanni atuutsinneqalernissaa Naalackersuisunit pingaartinneqarlunnartoq ministeeriaqarfimmit ilisimaneqarmat Justitsministeeriaqarfiullu suliassaq 2018-imi taamatut pingaartinniaraa."*

Naalackersuisut pingaartillunnarpat kingornussisarneq pillugu inatsisip ullutsinnut naapertuuttunngortinneqarnissaa Justitsministeeriaqarfiullu akissutaanut uku ilanngukkusuppaat:

Kingornussisarneq pillugu inatsisip Kalaallit Nunaannut atuutsinneqalernissaa eqqarsaatigalugu Justitsministeeriaqarfik ukiuni kingullerni oqaloqatigineqartarpoq. Kingullermik ulloq 4. juli 2017 Naalackersuisut Justitsministeeriaqarfimmut ilisimatitsissutigaat kingornussisarneq pillugu inatsisip nutaap atuutsinneqalernissaa pingaartillunnaritsik.

**3. Naalackersuisut pilersaaruteqarnerlutik kingornussisarnermut inatsimik tigusissallutik? (Kingornussisinnaatitaanermut eqqartuussivik allatorneqarnikuuvoq liste II-mi Namminersorneq pillugu Inatsimmut ilanngussami aamma taamaasilluni tiguneqarsinnaavoq Naalagaaffeqatigiinnik Oqartussaaffinnut isumaqatigiinniareernerup kingorna).**

Kingornussisarnermut inatsimmik tigusinissaq pillugu maannakkorpiaq pilersaaruteqartoqanngilaq.

Naalackersuisut sulissutigaat suliassaqarfiup tiguneqarnissaata tungaanut suliassaqarfiup Danmarkimisulli pitsaatigisumik Kalaallit Nunaanni atuutsinneqarnissaanik naalagaaffiup qulakkeerinninnissaa.

**4. Kingornussisarnermut tunngasunik soqutiginaateqarsinnaasunik allanik Naalackersuisut nalunaaruteqarsinnaanerlutik?**

Naalackersuisut pingaartippaat kingornussisarneq pillugu inatsisip ullutsinnut naapertuuttunngortinneqarnissaa justitsministeeriaqarfiullu suliassamut missingiutissaa utaqqimaarlugu.

**5. Naalackersuisut qinnuigineqarput inatsisit Danmarkimi inatsisinik nutaanik taarserneqarsimasut allattorsimaffiannik sanaqqullugit, ersersillugu taakkunani inatsisit qanganitsit sorliit Kalaallit Nunaanni suli atuutsinneqarnerisut. Naalackersuisunut tassunga atatillugu nassuiaqquneqarput, kungnip akuersineratigut danskit inatsisaat nutaat nutartikkat sorliit atuutsilissallugit pilersaaruteqarnerlutik imaluunniit pineqartut immikkoortut tiginissaannut sunik**

## **pilersaaruteqarnerlutik.**

Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoqarfiup ilisimatitsissutigisinnaavaa inatsisinik atuutsitsinerup iluani inatsisit uku ullutsinnut naapertuuttunngortikkusunneqartut. Tassaasut:

1. Kingornussisarneq pillugu inatsit
2. Toqusut pigisaasa agguarneqartarnissaannik inatsit
3. Apparisaq toqukkut qimagunnerani pigisat agguarneqartarnissaannik inatsit
4. Pinerluttulerinnermi inatsimmi § 240, imm. 1
5. Piffinni illulinni aallaasersortarneq
6. Meeqqanik kinguaassiuutitigut atonerluisoqarsimatillugu suliat pisoqalivallaarnissaannut piffissarititat
7. Meeqqanut 15-it inorlugit ukiulinnut akuliunneq
8. Eqqugaasup inatsitigut inissisimanagera
9. Eqqunngitsuliorfigineqartup inatsitigut inissisimanagera
10. Aneernissamik iperagaanissamillu nalunaarutiginnittarneq
11. Sakkut pillugit inatsit
12. Politiit qanermi misissugassamik tigusinnaanerit
13. Inuiaqatigiinni kiffartuussinissamik pineqaatissiisinaaneq
14. Arsaarinnittarneq annertusisat
15. Takunnissimasup najugaata eqqartuussivimmi ilisimatitsissutigineqannginnissaa pillugu malittarisassat
16. Akiliisussaataaneermut piumasaqaatit
17. Eqqartuussissutit eqqartuussivimmut qullermut ingerlanneqarnissaannut akuersisussatut ataatsimiititaq
18. Eqqartuussivimmi nipinik immiussisarnerit
19. Suliani annertuuni eqqartuussisumik ataatsimik eqqartuussisup ilaqarsinnaaneranut inatsitigut tunngaviit
20. Eqqartuussinerup nalaani mobiltelefoninik atuinissamut inerteqqutit
21. Qanoq ukioqqortutiginissamut piumasaqaateqaraluartoq sulianik naammassinnilluni suliaqartarnissaq
22. Politiit unnerluussisussaataasut arlaannaannulluunniit attuumassuteqanngitsut

Ilanngullugu ilisimatitsissutigineqassaaq danskit inatsisaannik nutaanik kunngillu peqqussutaasigut ullutsinnut naleqqussakkanik suliaqartoqarnissaannik siunnersuuteqarnissamik imaluunniit suliasaqaarfiit pineqartut tiguneqarnissaannik eqqarsaatersuuteqarnermi Naalakkersuisut pilersaarutaat angusaallu siunnersuutini nassuiaatiniluunniit Naalakkersuisut Inatsisartunut saqqummiussassaanni takuneqarsinnaammata.

Inussiarnersumik inuulluaqqusillunga



Sara Olsvig

Isumaginninnermut, Ilaqutariinnermut, Naligiissitaanermut Inatsisinillu Atuutsitsinnermut Naalakkersuisoq